

世界漢詩同好會 第34次總會參加詩

韓國篇

摠 15 人 22 首

〈一〉 迎新年

1. 作者：葛亭 權宰興

時年月日各干支，稱節循行亦自移。  
舉世和平迎吉運，諸家安樂迓祥禧。  
春情完感庭梅樹，溫氣先傳路柳枝。  
隔海遠方吟醉士，正歎同座未分卮。

2. 敬菴 朴容圭

衰病蕭蕭藥以支，黃金不買少閑時。  
春來鄉夢憑誰說，老去親恩亦可知。  
耄耄人生何有樂，頓忘世事作閑詩。  
伊今安脫繁華界，慢到故村培瑞芝。

3. 作者：清溪 趙冕熙

其一

斗柄指東春節移，新年實到自今時。  
西山落日何能繫，東海祥雲是可期。  
窮谷雪消溪水漲，近山地濕草芽滋。  
團圓親族屠蘇勸，省審先塋具歲儀。

其二

新正過時舊正期，至今舊正樹旌旗。  
奈何昨歲徒虛送，也誓今春有可爲。  
不老乾坤如許在，無常人事幾多移。  
一家團聚相祈福，瑞雪庭梅供賀儀。

\*新正：陽曆一月一日⇨舊正(韓語 Seolnal=中國春節)：陰曆正月初一日。

4. 作者：柏村 權奇甲

龍藏已出躔移馳，鱗族年支寅月之。  
殘曆窮谷經臘許，新萱生葉入春期。  
山陰雪色遲寒意，柳岸朝晞動翠眉。  
淑氣先驅青帝令，歡呼天下景明吹。

5. 作者：元谷 邊瑄燮

新臨領袖執權時，南北平和統一期。  
官吏清廉千里逸，政街正直萬民怡。  
紅顏已盡成章緩，白髮漸催得道遲。  
世界通商增大裏，文明發展致誠宜。

6. 作者：池濬

薄宦漂流意已疲、新年何幸有歸期。  
一身老病閨中憶、五口艱難驛上悲。  
明日植蘭香自起、今春種竹月應垂。  
寧知散髮秋江暮、獨笑生平參且差。

7. 作者：石村 李斗熙

嚴冬栗烈輒支離，日待三元歲換時。  
老眼厭看新曆日，霜威猶染舊顏髭。  
兒孫獻壽芝蘭列，門巷虔祈福祿隨。  
臘盡乾坤春色早，萬家俱願太平期。

8. 作者：一愚 李忠九

獻歲發春天運移 萬家咸祝太平期  
祖孫抱擁同堂樂 兄弟團欒一座怡  
階下新萸芽出際 川邊寒柳眼開時  
人人年計胸中在 惟順無違日夜思

9. 作者：健祐 趙溶熙

立春過後三元節，世界同人會以詩。  
網上盃簪相賀歲，庭梅瑞雪共熙熙。

---

## 〈二〉迎春

1. 作者：清溪 趙冕熙

萬國同文好會支，於焉十載共題詩。  
團圓家屬迎春節，凍解江流雨水時。  
桂魄飛光莫自發，梅枝附雪蕊相欺。  
東君用事青氛動，華麗山河有可期。

2. 作者：雲溪 趙昌來

其一

夜來瑞雪布銀帷，隱几凝思對日曦。  
步步春娘越嶺近，漸漸暖意隔江時。  
山腰洞口新圖畫，臘尾歲頭舊俗戲。  
從古文人多好事，今年須作萬篇詩。

其二

出迎郊外尚遲遲，寂寞江山雨雪時。  
騷客先聲傾大塊，春陽驕步上梅枝。  
花房蝶舞他年事，柳幕鶯歌老敢辭。  
猶有丹田豪氣在，竦肩拍案讀唐詩。

其三

人生望八欲何之，只作退軒粥飯尼。  
千軸圖書埋斗室，一燈寒穗伴支頤。  
藏胸無限好文字，開口奈何便錯差。  
第待來頭花鳥節，清茶相屬試新詩。

其四

儂本遐鄉讀書兒，偶然飄泊大江涯。  
文叢句讀鏡他眼，職路昏晨鬢得絲。  
北地風寒梅未雪，南村氣暖柳噓眉。  
蒼茫往事如春夢，強掃塵累自笑詩。

其五

稚陽至后鴻漸遠，造化深工次第推。  
李白桃紅歸繪手，鶯歌蜂舞入文詞。  
年年終始循環裡，物物往來順逆隨。  
李杜啁嘈千載後，江湖滿地得佳詩。

3. 作者：池濬

春來仍抱病、三嘆歲華馳。  
更想花開落、何論世險夷。  
隔窗雲嶺遠、映榻夕陽遲。  
肯負江湖志、殘生復幾時。

4. 作者：菡齋 尹烈相

冬去春來景色移，首於四季最嘉時。  
雪消大地風初暖，雲捲長天日落遲。  
柳眼開綿柔軟美，梅花綻臉暗香奇。  
騷人感興吟觴樂，振作詩風燦爛期。

5. 作者：仁山 趙錫熙

約逢獻歲發春時，相賀新元絕律詩。  
片片六花疑柳絮，韶光到處澗流馳。

6. 作者：霞山 李鍾福

群生蟄伏過冬時，不覺東君野馬吹。  
禽雀窺知青帝事，草花苦待蒼庚姿。  
親朋笑話常敲掌，稚子嬌癡暫解頤。  
老去頻呼歌白雪，迎春自樂復携誰。

7. 作者：東坵 李定栽

迎春桃李潤千枝，阡陌農翁德亦怡。  
百物蘇生成綠野，四時變化映明池。  
風清岸上風習習，日暖庭前日遲遲。  
殘雪餘寒花競綻，循環節序不違知。

8. 作者：省軒 朴海春

立春大雪降天時，國泰民安吉兆知。  
一夜寒威銀覆野，千家祥瑞白粧姿。  
竹林添翠爭新色，梅信傳紅到舊枝。  
老去騷人惟有願，江湖閒夢太平期。